

Onông ' Inôngô !



amwaréré !

Tchô ma dul'ikôndô : ka zwa kériza, Tchô wa bégé ntcaga : kô ma pè'gnô !

Ndo nènô, za bambya nkombé – nongo, go buligna zwè isamu yi djèno yè, pila g'igono. Hum ! Osamu g'élombè ; osamu ga nènô : osamu wi mènè ! Véndé mènè ré myo !

A yè nè, nkala ya piéni dikidiki, inôngo gna buni n'Agulimpazavaza. Lémba gho pazavaza, wé ré bé tumb'olingo ozèghè kô bé djèna andombyani mi bônizé Ngwè. Amôri nè, tchô iyano aluwo orèndô vônô wa sizi yo ! Ndo ogul'Ayina, ga gé bongé akasu... Ma buté bambizé tata gho bénguna myè osamu mè wô, a fiza nè : « A mwami, ngôma yo mwana yé kamba kao go tulungu.... Ndo tchô wa kéka , gènizaré go bôswawôswa ! » A pa myè : pèmba, okosa, oméngo n'ézalina. A kunda manè : « okéli ni boso, ontému ni gnuma. Tchô wa djon 'Akwémbé, wôra ano mè. Véndé Anagha dudu w'inôngô wa vili ozômbi omo : ozômbi azapil'oyino ni mbuni ntcambi. Tchô wa djèna Ogula, vingwa wè kao ni nkowa mo. Inôngô gniré diwangéma wo djila, za zélé gnènè ta g'alonga. Vônô, Ngwè ya sapikili ni si nkumba. Géré wô wi binwa kèngô, wô wi tumwaruma, wô wi dôgwilôgô, wô wi dôkw'arôga alèwana mong'agnémba. »

Awyé-kota orèma myè éfaré, ma buté bésa igamba mègnônô mbyambyé. Ma dôlina gé paga z'inôngô ! Oh ! Orèma myè handi mbwa !

A djila-djénda, mayilé-mayéndjé, yagé bé djéné : Améngaménga, igondjé, ngwè-vilo n'akaga g'inamba si ntcwana s'apénga, ampumbulya n'apundjina méré to déngo yènô ; g'agnanga – gnanga m'épaga mé kô dingilya andongwè mi tiga Owaro-Ngwè ololowa. Ayèna : Agnémba – gnémba ngémba –ngémba, agnéna amôri awana, oghwèra sôla-sôla ayiliz'ozômbi, érumbé éwondjo zangé, a tanizo élymbiatintin. G'atè, véndé wa démbé bolé éléngé, ombwiri ré djina ! Ezômbi gh'ézombo a déngé ézômba, tata nè wa zonga, sambo wa zômba omé du g'okili !

Ma bambiza ognémba-gnémba, ntina yé sôkôlia yè inôngô. Ayè nè :« Véndé ntchôni-dènga ré poma n'omah'wènè nkôngônô agnéni okémô n'imbun'ayèna ». Ndo Rèmarongè onoki, aporo nè vô ga djingini yè ga gamba mi djèmbè. Rè-kadyè nè a buté sombé ntchombè yi ntchombé, ndo kaka-poyo vônô zima, a tugwé ngôri, a vona yè n'intco 'mbé, a viza manè : « gnéza myè, mi ré dadyè kao ni ntchômbi y'ozômbi, wé buté nèghira ntchômbô ? » ndo ni ntchômbwani, a dyufinayé ntchômbôzômbô. A ! mènè, émènô onôngô kao ni pasiza s'anaga.

Oma wé kangana n'obèli, a vémé intchimini sè ! O vili go nkondé, ovémé si nkondé. Okéngélé a sin'okèngèlè gho kénda okéngé.... Arya rwéni , oh ngwé !

Ntchilo y'ampanga m'inôngô a buté bé kamba, a djènizo aguga ! wawo yé nè : “ fèfèdè-fèdè!”. Gnôngô môri, a sindina, gnôngô yi mbani akot'okuwa, ndo gnôngô yi ntcharo ayè kè : « fèfènè-fèni ».

Ma buté kwéna g'ozôzô, mama nè zimbria ! Rèti nè go djano n'oma égomè, ndo tchô émènô igôwi, igôwi gni nwo ni kumba, sambo gho djano ni mbun'anaga : ozavino égombé yèwô !

Myè nè a mama : « Agnambyè ayôlé tigané ndjindji n'osamu , zaga gambiné orowa, inôngô gné figna g'alonga ». Mama bé fiza manè : « A wè bèrèbè ni tonda si ngwè, a wé féma nè igonga gné kilo wè agali, no gni djona wè ».

Sambo zwé dénda sè, g'émènô z'éyanga za twèno zwè ?

Erumbé zami nè : « Tchô inôngô gni ré kékiza gho dwana mbwa agholo anayi okil'omôri sambo élwano zi djôgôni : djôngaga aningo, ponaga orowa. Ompéné édombina g'abaka , Agnambyè akéwa».